

Naor Oolde- en Ni'jlaemer!

Et lietien 'We gaon now op vekaansie...'

1. Piepmoes, Diedel en Daweltien bin op vekaansie naor Oolde- en Ni'jlaemer en hebben heur tente opzet bi'j de Braandemeer. As ze daar op een aovend even kieken, bliekt dat d'r in et waeter een moonster mit griepaarms woont. En hoe ze ok grommen, blaffen, keffen, janken, grauwen en piepen, et moonster lat him niet verjaegen. De drie kammeraoden maeken dat ze in heur tente kommen en besluten om niet weer naor de Braandemeer te gaon.

Mar is dat wel neudig? Zit d'r echt een moonster in et waeter van de Braandemeer?

2. Lianne mit ...

3. Piepmoes, Diedel en Daweltien gaon naor de klokkestoel van Ni'jlaemer. Piepmoes en Diedel zollen aenlik best even bovenin de klokkestoel kieken willen, want daar bovenin kuj' vast ok hiel veer om je toe zien.

Dan beginnen ze te klimmen en te klimmen...

As ze bi'j de klokke binnen kieken ze om heur henne. Hiel in de veerte zien ze de schoele staon en nog veerderop ligt de Braandemeer.

Mar as ze weer naor beneden willen, vaalt dat niet mit. Zo gauw as Diedel een pote naor beneden zet, raekt hi'j zowat et evenwicht kwiet. Hi'j trekt gauw de pote weer omhogens. Dan perbeert hi'j et mit de aandere pote. Mar dat lokt ok niet. 'Ik durve niet naor beneden,' jankt Diedel. 'Hoe moet dat now.'

Piepmoes daenkt even diepe nao en raost dan: 'Ik weet et! Diedel, ik klim bi'j jow op 'e kop, pak de klepel van de klokke en slao die tegen de raand.'

Alle meensken van Oolde- en Ni'jlaemer heuren et. Wat is d'r, zeggen ze, waaromme ludet de klokke? Iederiene stoft naor buten, gript een fiets of een auto en ze rieden zo hadde ze kunnen naor de klokkestoel. En dan zien ze dat d'r een HOND bovenin de klokkestoel zit. Hi'j jankt en piept dat et niet mooi meer is. Gauw klimt d'r iene naor boven en tilt Diedel naor beneden.

'Van wie is disse hond, die mient dat hi'j as een katte klimmen kan?' vragt de man. Mar d'r is gieniene die et wet.

Dit komt niet goed, schöt et deur Diedel henne. Straks brengen ze me nog naor een asiel. Hi'j moet d'r niet an daenken. Diedel scheurt him in ienkeer los van de man, en draeft hadde et pad op naor de weg toe. Dan zicht hi'j Daweltien en tegere draeven ze over de lanen naor heur tente toe.

En Piepmoes? Die zat mooi verstopt in de ploemstat van Diedel en komt in de tente pas veur et locht. Wat een aeventuur hebben ze beleefd...

5. Lianne mit ...

6. Vannaacht wi'jde et zó hadde dat et leek as zol de tente de locht invliegen. 'Dat hadde mal gaon kund,' bibbert Piepmoes de volgende morgen nog een betien. Weten jim wat we doen? We gaon een hol in die boswal maeken!' Diedel en Daweltien potsen even laeter in de boswal en de kluten grond vliegen om heur toe.

As de hutte klaar is zitten ze onder et zaand en schudden heur goed uut. D'r vaalt van alles op de grond: donker zaand, geel zaand, roodachtig zaand, klonties vene, kleine stokkies mos, kleine stienties, blatties en gao mar deur. 'Weej' wat we doen?' bedaeckt Daweltien. 'We haelen een groot stok pepier en liem op en maeken van al dat zaand een schilderi'je. We maeken eerst een tekening op et pepier, en dan strieken we daor liem op. Daornao strujjen we alles wat hier ligt over de liem. Moet ie es zien hoe mooi as dat wodt!' As et schilderi'je klaar is ze hangen ze et op in de ni'je hutte. Aovens schoeven ze de takken die Piepmoes verzaemelt het veur de ingang. En ok al wi'jt et opni'j hadde, ze hebben daor now hielemaole gien hinder van.

7. Lianne mit ...

8. Piepmoes, Diedel en Daweltien gaon te zwemmen naor een sloot argens in et laand naost de boswal.

Bi'j de sloot gaon ze eerst in et grös zitten om wat te drinken. Ze kieken intied naor de sloot en heuren en zien alderhaande waeterbesies:

'Plop, plop, plop,' dat is een vis.

'Fffjjttt, fffjjttt, fffjjttt,' dat is een libelle.

'Ieieieuw, ieieieuw, ieieieuw!' dat is een waeterkrobbe.

'Kwaek, kwak, kwaek, kwak' dat is een kikkerd.

En d'r zitten nog veul meer waeterbesies in de sloot. Zóveul, dat de drie kammeraoden besluten om niet zwemmen te gaon. Want stel je veur dat ze op iene van die besies springen; dat zol wel es mal oflopen kunnen...

Nao die dag zit de vekaansie d'r al weer op. Van et moonster hebben ze hielemaole gien last meer had. Zol dat moonster aenlik wel bestaon? Weten jim et??